

www.BibleForChildren.org



उत्पत्ति 6



नूह इन वंशावली ईद हुन. नूह धर्मी
मंळसा अदिक तान समय दा लाँकुर
दा खरा ईरोन; अदिक नूह परमेश्वर
उन अच सांगुळ नळुतेला ईत्तुन.
अदिक परमेश्वर पृथ्वी मा जो नजर
हाकदुन रा नोळदुन कि अद

बिगळुसकु
आद; यतिकी
सप्पा प्राणीगोळ
पृथ्वी मा तान तान
चाल-चलन
बिगळुस बुटीदव.



आग परमेश्वर नूह से अंदुन, “सप्पा प्राणीगोळद अन्त
माळोद सवाल नान मुंद होट बंदाद; यतिकी आंदुर
कारण पृथ्वी उपद्रव देल तुम्मेग्याद, इदुरसाटी ना
आंदरी पृथ्वी सांगुळ नष्ट माळ बुळ्ळईन.”



“इदुरसाटी नी गोपेर इन मारं इन हुळली इन अंद
जहाज माळकोम, अदुर दा कमरागोळी माळेत,
अदिक व्हार्या-बुळक अदुर मा राल हचेत.”



ई ढंग देल नी अदरी माळेतः
जहाज इन लंबाई मुर सौ
कय, चौळाई पचास कय,
अदिक ऊचाई तीस
कय इन
ईरूल.




“अदिक अलग अलग तिनोद
सामान, अवरी नी हुळकु तान
हात्ती जमा माळकु ईटेत; जो
नीनी अदिक अऊर तिनोर
साटी ईत्तीत.”



अदिक सप्पा जित्ता प्राणी दा टु नी ऊंद ऊंद जाती इन येढ्ढ
येढ्ढ, मतलब ऊंद नर अदिक मादा जहाज दा वोतकु,
तान सांगुळ जीत्ता ईटेत.




सप्पा जाती इन शुद्ध जनावर दा टु रा नी येळ येळ जोळी मतलब नर
अदिक मादा ताकोमेत; लेकीन जो जनावर शुद्ध हैलेच,
अऊर दा टु येढ्ढ येढ्ढ ताकोमेत, मतलब नर अदिक
मादा; अदिक आकाश इन पक्षी दा टु भी येळ येळ
जोळी, मतलब नर अदिक मादा ताकोमेत, कि
अऊर वंश उळकु पुरा पृथ्वी इन म्याकुच
बन्सकु ईरूल.





नूह तान पारगोळ, हिंस, अदिक
तान सास्सागोळ सांगुळ जल-प्रलय
से ऊळोर साटी जहाज मा होदुर.





याग नूह अन ऊमर इन आर सौ वर्ष
इन दुसरा तिँगुळ इन सतरावा दिन बत्त;
अदा दिशी धोळद गहरा समुद्र अन सप्पा
सोतागोळ वळद कुरतव अदिक आकाश
इन झरोखागोळ खुलसेदव.





अदिक माळ चालीस दिन अदिक
चालीस ईळल्क पृथ्वी मा आगतेला ईत्त.



नीर वाळुस्त वाळुस्त पृथ्वी मा हापाळ
अच वाळुसेत, अदिक जहाज नीर इन
म्याकुच म्याकुच तैरूस्तेला ईत्त.



नीर पृथ्वी मा हापाळ अच वाळुसेत, ईल ताका कि पुरा धरती मा
यास भी धोड्डेव धोड्डेव पहाळीगोळ ईरोव, सप्पा मुळकेदव.
जो जो जागा मा ईरोर, अऊर दा टु यास मुंदुर्द मुग्गगोळ दा जीवन
इन श्वास ईरोद, सप्पा सोतोदुर.



लेकीन परमेश्वर नूह अदिक यास आळी दाकळव
जनावर अदिक घरेलु जनावर आऊन सांगुळ जहाज
दा ईरव, आ सप्पा अन्द सुधी ताकोंडुन: अदिक
परमेश्वर पृथ्वी मा हवा नळसदुन, अदिक नीर
कम आगतेला बत्त; . . .



... अदिक गहरा समुद्र अन सोतागोळ अदिक
आकाश इन झरोखागोळ बंद आगेदव; अदिक अदुर
देल जो माळ आगतोगोद अद भी रूकसेत; अदिक
ऊंद सौ पचास दिन इन बाद्दा नीर
पृथ्वी मा टु लगातार कम आगतेला ईत्त.






बाक हींग आत कि चालीस दिन
इन बाददा नूह तान माळद जहाज
इन खिळकी तेरूकु, ऊंद कागग उक
ऊळुस बुट्टुन: यागास ताका नीर
पृथ्वी मा तु वंळगीदिल, आगासताका
ताका कागग ईत्त आत्त वयाळतेला ईत्त.

बाक आव तान हाती तु ऊंद कबूतर
इक भी ऊळुस बुट्टुन कि
नोळुल कि नीर पृथ्वी मा
तु कम आत कि ईला.



अदिक दुसरा तिंगुळ इन सत्ताईसवा दिशी पृथ्वी पुरा रीति देल वंळगेत. आग परमेश्वर नूह से अंदुन, “नी तान पारगोळ, हिंस, सास्सागोळ सांगुळ जहाज दा टु होट्टबुळ.”



आग नूह यहोवा अन साटी
ऊंद वेदी माळदुन;
अदिक सप्पा शुद्ध
जनावर अदिक सप्पा
शुद्ध पक्षीगोळ दा टु
येनारा येनारा हुडुकु वेदी
मा होमबली येसदुन.



बाक परमेश्वर
अंदुन, “जो वादा ना
नीम सांगुळ, अदिक
यास जीत्ता प्राणी नीम
सांगुळ आव आ सप्पा अन
सांगुळ भी युग-युग इन पीढीगोळ
साटी कटतीन, अदुर्द ईद चिन्ह

आद : ना बादल दा तान
धनुष ईटीन, अद नान अदिक
पृथ्वी इन बीच दा वादा
अन चिन्ह आदीत.”



“अदिक याग ना
पृथ्वी मा बादल
फैलुसाईन आग बादल
दा धनुष कांळसीत.
आग नान वादा जो नीम
अदिक सप्पा जीत्ता शरीरधारी
प्राणीगोळ सांगुळ कटकु आद;

अदरी ना याद माळाईन,
आग ईत्ता जल-प्रलय बाक
आगतीदील यदुर देल सप्पा
प्राणीगोळद विनाश आगुल.”



बाक परमेश्वर नूह अदिक
आऊन चिकोरगोळी आशीष कोट्टुन
अदिक आव अंदुन, “तान जिन्दगी
माळी अदिक वाळुसी,
अदिक पृथ्वी दा तुम्मेगी.”



नूह उन चिकोर जो जहाज
दा टु होट्टुर, आंदुर शेम, हाम अदिक
येपेत ईरोर; अदिक हाम कनान उन
आप्प आदुन. नूह उन मुर चिकोर
ईदुरा उर, अदिक ईदुर्द वंश
पुरा पृथ्वी मा फैलुसेत.



यतिकी परमेश्वर दुनिया से हिँग प्यार ईटदुन कि
आव तान ऊंद ठैसा पार कोट बुट्टुन, ताकी जो
यावारा आऊन मा विश्वास माळयान आऊन
नाश आगबाळुल, लेकीन आऊक अनन्त
जीवन सिकुल.



रोमियों 3:23

इदुरसाटी कि सप्पा मुंदुर पाप माळ्यार अदिक परमेश्वर उन महिमा देल
हापाळ दुर आर,

रोमियों 6:23

यतिकी पाप इन मजदूरी रा मृत्यु आद, लेकीन नाम परमेश्वर उन अनुग्रह
अन भेंट नाम प्रभु मसीह यीशु दा अनन्त जीवन आद.

इब्रानिगोळ 9:27

अदिक ह्यांग मंळसागोळ साटी ऊंद घन सायोद अदिक अदुर बाद्दा परमेश्वर
उन द्वारा न्याय इन आगोद तय आद,



इफिसिगोळ 2:8,9

यतिकी विश्वास इन भेंट इन द्वारा अनुग्रह देल अच नीम्द उद्धार आत, अदिक ईद नीम्द दी टु ईला, बल्की परमेश्वर उन दान हुन, अदिक ना कर्मगोळद कारण, हिंग आगबाळुल कि यावारा घमण्ड माळुल.

रोमियों 10:9,10

कि अगर नी तान बाय देल यीशु उक प्रभु जान्सकु अंगीकार माळया, अदिक तान मन देल विश्वास माळया कि परमेश्वर आऊक सोत्तुर दा टु जित्ता माळदुन, रा नीन जरूर उद्धार आदीत. यतिकी विश्वास माळदुर देल नाव परमेश्वर उन सांगुळ सही संबंध दा बरतेव अदिक बाय देल कबुल माळदुर देल नामी मुक्ति सिकतद.



यूहन्ना 3:16,17

“यतिकी परमेश्वर दुनिया से हिँग प्यार ईटदुन कि आव तान ऊंद ठैसा पार कोट बुट्टुन, ताकी जो यावारा आऊन मा विश्वास माळयान आऊन नाश आगबाळुल, लेकीन आऊक अनन्त जीवन सिकुल. परमेश्वर तान पार उक दुनिया दा इदुरसाटी कळीदिल कि दुनिया मा दण्ड इन आग्या कोळुल, लेकीन इदुरसाटी कळयान कि दुनिया अक आऊन द्वारा उद्धार सिकुल.

1 यूहन्ना 5:11-13

अदिक अद गवाही ईद हुन कि परमेश्वर नामी अनन्त जीवन कोटान, अदिक ईद जीवन आऊन पार उन दा आद. यार हात्ती पार आन, आऊन हात्ती जीवन आद, अदिक यार हात्ती परमेश्वर उन पार हैलेच, आऊन हात्ती जीवन भी हैलेच. ना नीमी, जो परमेश्वर उन पार उन हेसुर मा विश्वास माळतीर, इदुरसाटी लिखसतीन कि नीव अर्त कोमी कि अनन्त जीवन नीम्द आद.



उत्पत्ति 6 – 10

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot, Tammy S.

Holiya Bible (hoy) © The Word for the World International
and Holiya Translation Samithi,
Kudwa, Gondia, Maharashtra 2025

<https://www.bible.com/en-GB/bible/2782/MAT.1.HAA25>

©2026 Bible for Children, Inc.

www.M1914.org

www.bibleforchildren.org

